

四庫全書

經部

欽定四庫全書

經部

春秋集傳詳說卷十八

詳校官鴻臚寺少卿臣梁景陽

給事中臣溫常綬覆勘

覆校官博士臣劉光第

校對官助教臣汪錫魁

謄錄監生臣沈浩

欽定四庫全書

春秋集傳詳說卷十八

宋 家鉉翁 撰

成公下

簡王五年晉
景十九年

十年春衛侯之弟黑背帥師侵鄭

義已見
隱七年

母弟出聘脩時事之常猶之可也以將兵伐國非所以親愛其弟春秋之書之所以譏也春秋有書齊侯之弟秦伯之弟鄭伯之弟宋公之弟者書弟雖同立義各異先儒一皆以為貶殆不然也是役也衛以晉

命侵鄭春秋之書之責晉也既執其君又伐其國又使衛人自以其兵侵之晉景無能於楚而務殘小國桓文之罪人也以弟帥師責衛也以諸侯伐諸侯責晉也是之謂一書而再貶

夏四月五卜郊不從乃不郊

義已見僖三十一年

古之郊也有常時夏正之郊則以上辛行事上辛有故則以中辛何事乎卜若園丘之郊則必以至日禮不卜常祀而卜牲者是也而左氏每書啓蟄而郊蓋

獻子亦曰郊而後耕蓋祈穀之郊也祈穀之郊即夏
正之郊古者春有祈秋有報夏正之郊所以祈也季
秋大饗所以報也魯人自知郊之為僭不敢純用王
禮故卜而後郊春不吉而卜夏卜秋是以有五月九
月而郊者斯魯之僭禮也必欲以魯禮而合三王之
禮則為強求其說此所謂五卜郊者卜以占天意吉
而後郊自僖公以來以為常春秋書之見僭禮之無
福

五月公會晉侯齊侯宋公衛侯曹伯伐鄭

左傳謂晉侯有疾立太子州蒲為君而會諸侯伐鄭
考之經書法不異它日父在子為君而會諸侯伐國
古所未有是時晉非有危亡怵迫之故何至為此愚
意其為傳聞之誤耳是時鄭伯見執在晉鄭人立君
衆殺之而立髡頑君在而立君者鄭也非晉左傳所
記因魯史傳聞之誤耳父在而爵其子春秋必不然
或曰是役也諸侯皆爵何哉曰貴改過也前日執鄭

伯伐鄭過也今聞鄭有亂立君至於再晉人移其所
以治鄭者而撫鄭歸其君而定其國是春秋所與故
皆爵

齊人來媵

義已見上

丙午晉侯孺卒

景公也卒不葬義見下公如晉孺乃侯切

晉自靈成以來霸業日衰非復文襄之晉矣景公始
即位而荀林父有邲之敗諸侯叛而去之國勢浸削
蜀之盟從楚者十一國晉莫如之何也幸而卻克戰

齊而勝散者復合叛者復來霸威稍伸然天資庸闇
無皐白之辨荀林父逗撓喪師而殺先穀欒氏怙黨
專恣而害趙宗妄欲伸主威而不知是否邪正之辨
正如漢哀帝臨朝屢誅大臣忠正之士無罪以死而
王氏謀取其國家乃不覺悟內不明而輕用大戮此
為君者所宜戒也

秋七月公如晉

宣公奔齊惠之喪齊人以是加厚於魯成公奔晉景

之喪晉人反用是肆悖止公預執紼自七月至明年三月乃得歸其亦有以自取矣天王之喪魯未嘗往會而霸國之喪僕僕亟往惟恐其後以事王者事霸魯固有罪而州蒲愾傲無狀止望國之君使之送葬是以王禮自居也春秋是以特削其葬以正其無王之戮或者乃曰為其辱魯故絀其葬非也

冬十月

十有一年春王三月公至自晉

舊說謂正月公在晉不書諱見止也但襄二十九年正月公在楚而書諸儒以是引季氏取卞有為亂之意公危不得入是以書公在楚公至自楚危公也愚以一時之事而言在晉在楚均為強國所止而有內外之異見止而在晉也猶為內也見止而在楚也則外矣書不書其以是故

晉侯使卻曄來聘己丑及卻曄盟

或曰卻曄來聘而盟與三年荀庚來聘而盟書法全

同其事同乎否乎曰不同也荀庚之聘而盟尋舊盟也實魯自嫌其貳求與為盟故雖伉也其責在魯今卻犇之來繼公至而書蓋晉人自知其無禮於公懼公之遂叛而即楚故隨遣卻犇為此盟其責在晉是時晉厲新立輕狂不度欲以無禮加於諸侯春秋書以貶之

夏季孫行父如晉

秋叔孫僑如如齊

僑如之如齊行父之如晉事同而情異者也魯自鞏
之戰與齊久絕至是僑如如齊以脩舊好脩鞏以前
之好云爾魯昔者不堪齊之陵暴借力於晉以紓一
時之忿至是受侮於晉君臣日奔走於庭而猶懼不
免於是介然以悔惕然以思將尋舊好於齊故行父
如晉僑如適齊事同而情異者也春秋是以比而書
之俾後之有國家者務自强以立其國無若魯人左
右望於齊晉求所以自全而不可得也

冬十月

十有二年春周公出奔晉

公羊曰周公者何天子之三公也王者無外此其言
出何自其私土而出也穀梁曰周有入無出其曰出
上下一見之也注云上謂天王出居于鄭下謂今周
公出奔左傳亦云自周無出周公之出自出也此春
秋大一統之義三傳得之於聖門者也周公楚惡惠
襄之偏且與伯與爭政不勝怒而出及陽樊王使劉

子復之盟于鄆而入三日復出奔晉故言自出傳因襄王出居之出原春秋無外之意而有自周無出之說此所謂內外之辨俗儒有以為不然者未之講故爾春秋之世諸侯之大夫有出奔列國者去此即彼姑務自全可也至於天子之公卿乃亦以事爭而奔列國彼列國受之而不以為嫌是天下而有無王之國也周公王朝大臣與強族爭政王不能裁其予奪則引而退可也今以爭不能勝怒而出王既復之與

之盟盟而入而又奔是其心欲挾霸國以脅天子
春秋書出書奔所以誅也絕之王朝其為誅斥也大
矣或曰襄三十年子瑕奔晉昭三十六年子朝奔楚
書奔不書出又何歟曰殺佞夫而逐子瑕非子瑕之
自奔也故不書出若子朝奔楚則與此異朝周之篡
人也楚僭國也以篡人而奔僭國彼自謂出於王化
之外春秋奔而不出猶曰此吾之篡人楚於義不得
受也

夏公會晉侯衛侯于瑣澤

案左傳前年晉人釋鍾儀求成于楚楚公子辰如晉聘晉復遣糴莠以往宋華元以其善於楚令尹子重又善於樂書從而合晉楚之成而春秋惟書晉魯衛會于瑣澤諸侯無預者晉楚為成關係不細春秋略而不書豈無意乎蓋春秋所以待楚人者乃帝王御遠之道來則禦之憑陵上國倔强無王則伐之未有舉中國之大而胥與之求為盟好者也齊桓之於楚

討而服之晉文之於楚敗而卻之而霸者之職事舉矣晉自靈成君昏闇而臣情偷以避楚為得計至是因俘累以通意遂交聘而為之成晉固苟求安佚而楚實怙其强大略無息肩之意後三年渝盟伐鄭無所恤也又其後宋向戌復持弭兵之說為盟而長楚遂使中國諸侯北面於荆楚之庭申之會冠履倒置而兵未嘗一日弭也其禍端亂本實兆於此故瑣澤之會春秋書法如此不與晉以為此會也

秋晉人敗狄于交剛

義已見僖三十三年晉人敗狄于箕

劉氏意林外域者春秋之所外中夏者春秋之所內
所內者將以德治之所外者將以力治之中國可教
以禮義故不結日不偏陳雖有道猶惡之若夫外域
恃其強力其來為寇能勝之而已雖不結日不偏陳
無譏焉呂東萊曰春秋之世中國有事於外域未有
言戰者蓋過絕之為務唯力是恃不以戰為罪也愚
謂中國於外域以直敗為文者明分也言其非中國

之敵故不言戰傳者以不結日不偏陳為直敗則拘
矣中國與外域戰亦豈無結日而陳者乎諸儒以是
為拘遂有德治力治之說又有唯力是恃不以戰為
罪之說此為例所拘反覺有病秦皇漢武只為與外
域角力以致中國罷敝春秋之待夷狄自有道不徒
以力也

冬十月

十有三年春晉侯使卻錡來乞師

自入春秋盟主帥諸侯之師以伐叛討貳而書于策者多矣至是始書乞師伊川謂不以王命興諸侯之師故書乞此論固正但霸國不稟王命而動兵伐國前此不書乞師今而書之豈無其故邪蓋書乞師者二有望國求援于外而以乞師書者卑之也有霸國出諸侯之師而以乞師書者抑之也魯僖不堪齊人之屢伐乞師于楚取穀春秋謂其懦無立志故書乞師以卑之卑之者乃所以激而進之也今晉厲始立

血氣方剛欲以事功自見分遣大夫召諸侯兵將以逞其所大欲春秋為其銳於武功故書乞師以抑之抑之者乃所以節而止之也凡皆為後世人君垂法退者進之兼人者退之書法抑揚之所在也彼晉厲公者非自能為此謙抑之辭而有求於諸侯也許氏謂晉厲以偽飾之文而貶削霸體故不為春秋所與夫霸國之威患其日張不患其日削也彼其削非春秋之所憂也學者以是思之

三月公如京師夏五月公自京師遂會晉侯齊侯宋公

衛侯鄭伯曹伯邾人滕人伐秦

穀梁無齊侯

或曰晉用諸侯之師伐秦以復其私怨春秋其無貶乎曰為其朝王而後往請命於天子與上公俱行猶有尊王之心故皆錄而爵之也曰此本伐秦道成周而朝非特朝也春秋何取焉曰此春秋中年之書法志諸侯猶能稟命于王也周家盛時諸侯皆旅朝於京師或因巡守而朝于方岳之下未聞道過京師而

請朝者及其衰有過闕不下者矣自入春秋百三十年中間倡義尊王若桓文之盛不能率諸侯一朝於周而晉文為宮踐土屈天王而朝焉彼其心曰霸權之尊不為天王撓也及秦晉交兵晉侯嘗以師過周之境不聞請朝而後徃彼其心又曰吾自假道伐秦非為王而來奚事於朝是反得為知禮乎今晉厲朝而請命與天子之老偕行是猶知有尊王之義而論者或責其慢愚竊不謂然也今有人焉父子異宮而

處其一人過父之廬略不候起居傲然徑去其一人
止車下道徃見父聽所以命而後行將以略父而過
者為有禮乎以省父而行者為順道乎以是而觀則
晉厲猶在可取故春秋書公如京師又書自京師為
會書如京自京者錄其猶知有王也書自京師會諸
侯伐秦者示諸侯稟王命而後伐若征伐自天子出
焉此又春秋存周之意也或曰是役也劉康公成肅
公與師皆行春秋不書何歟曰伐秦與伐楚異伐楚

攘亂也上公會伐正也晉自與秦私鬪秦未嘗叛周
上公不當與之俱伐春秋不書二公親為此役義其
在是乎

曹伯廬卒于師

義并見下晉
侯執曹伯

秋七月公至自伐秦

孫氏曰不以朝京師至者明本非朝王

冬葬曹宣公

十有四年春王正月莒子朱卒

莒卒自此始徐邈曰莒本中國末世衰弱遂廢周禮葬皆稱諡莒君無諡故從吳楚例不書葬

夏衛孫林父自晉歸于衛

左傳衛侯如晉晉侯強見孫林父衛侯不可既歸晉侯使卻犇送孫林父而見之復之于位林父得罪於其君而奔晉奔而求復豈無他道乃挾晉以求復而君臣之道於是廢矣臣挾大國之援以干其君君以大國之故而忌其臣下陵而上忌亂之道也林父作

亂逐君其端實兆於此春秋書自晉歸于衛責晉也

秋叔孫僑如如齊逆女

義并見下

鄭公子喜帥師伐許

九月僑如以夫人婦姜氏至自齊

穀梁曰大夫不以夫人以夫人非正也以為刺不親迎愚謂國君不親迎者多矣不皆譏此書僑如以夫人至自齊以其非所當以也穆姜與僑如共謀逐季氏出入往來不避嫌疑之間季氏從而煽之惡聲日

聞於外今也逆君夫人大夫豈無可使者而使僑如其意欲使之重自結於齊實為魯國玷夫人亦預有辱焉

冬十月庚寅衛侯臧卒

秦伯卒

十有五年春王二月葬衛定公

三月乙巳仲嬰齊卒

襄仲之子

穀梁曰此公孫也其曰仲何也子由父疏之也注謂

父有弑君之罪故不得言公子父不言公子則子不得稱公孫是見疏之罪由父故公羊曰仲嬰齊者公孫嬰齊也謂之仲嬰齊為兄後也以為後歸父也愚謂弟無後兄之理以後襄仲耳歸父謀誅三家事弗濟而宣公薨歸父為季氏所逐故立歸父之弟以後襄仲非以後其兄也所以不稱公孫而稱仲嬰齊者當如穀梁之說襄仲之死也去公子而書仲所以誅也今其子不稱公孫由父有罪故耳舊史必書公孫

此春秋革之

癸丑公會晉侯衛侯鄭伯曹伯宋世子成齊國佐邾人
同盟于戚

晉侯執曹伯歸于京師

霸主稱爵而執諸侯有二晉文公入曹執曹伯畀宋
人貶也晉厲公執曹伯歸于京師與其為霸討也蘇
氏曰稱侯以執執有罪也歸之京師禮也春秋之書
執諸侯者多矣惟是為得禮論者以晉厲公不克終

凡行事數見毀疵而春秋東法至公於晉厲所行猶有取焉書晉侯執曹伯歸于京師與其討有罪也穀梁以為惡晉侯者非是前二歲曹宣公會諸侯伐秦卒于師公子負芻作亂弑嗣子自立為君至是晉厲合諸侯于戚執負芻歸之京師合諸侯而執篡賊從衆人之望執之公也自入春秋霸主之執諸侯未有執當其罪若此而又歸之京師以示不敢專是以特為春秋所與書法異於前或謂負芻篡立三年而後

見執為稽天討既與之盟而又執之故書同盟其不然歟蓋有崇獎篡賊列之會盟而終於無討者矣此更三歲而討不猶愈於終無討者乎會而執篡賊諸侯之所同欲是故書同盟夫既會而執篡賊復盟以戒諸侯春秋實與之而非貶也

公至自會

夏六月宋公固卒

楚子伐鄭

十二年晉楚為成期以弭兵諸侯固兼事晉楚矣甫
及三歲而楚伐鄭首禍也書楚子伐鄭志楚共之首
叛盟目其人而貶之非爵也其後卒有鄢陵之敗君
傷而臣死首禍之戮也

秋八月庚辰葬宋共公

宋華元出奔晉宋華元自晉歸于宋宋殺其大夫山宋
魚石出奔楚

春秋於華元之出之歸再見其氏名者錄華元之能

平內難也然一書而四以國見是亦有貶焉耳何氏
曰宋公卒子幼華元以憂國之故為大夫山所譖出
奔晉晉人理其罪宋人反華元誅山左傳則謂華元
行未及晉魚石追而復之討為亂者故桓氏殺蕩山
逐其黨國乃定二說不同愚竊觀書法華元奔晉自
晉而復何氏之說為正元之奔晉非奔也將藉晉力
以討亂晉人許之於是去而復還誅為亂者合二說
而觀當時之事可識矣書華元自晉歸于宋宋殺其

大夫山言因盟主之力以除在內之為亂者也蕩山
宋之公族乘其君始立而未定殺公子肥弱公室也
華元自以身為右師司君臣之訓起而討之以其族
大不假霸國之援事弗獲濟故自晉而歸山乃即刑
晉使之討而後能討也春秋去山族而正其伐本之
罪故與華以能討亂然以一人有罪而併逐其族則
元也亦太甚矣據左傳元之討山魚石有力焉山既
誅元乃併桓族而盡去之故魚石向為人鱗朱向帶

魚府皆奔楚春秋與元以討亂不與元以逐桓族以
其挾晉之力盡去異已其心不純乎為國是故貶之
耳是時諸侯之用事者皆自結於強國之大夫以操
制其臣民春秋惡之此一書而四以國見言宋之卿
大夫宋之罪人宋強族必待晉力而後能誰何亦將
無以為國焉耳

冬十有一月叔孫僑如會晉士燮齊高無咎宋華元衛

孫林父鄭公子魴邾人會吳于鍾離

始會吳

此中國諸侯會吳之始穀梁曰會又會外之也公羊
曰曷為殊會吳外吳也春秋內其國而外諸夏內諸
夏而外吳楚王者欲一乎天下曷為以外內之辭言
之自近者始也春秋內外之義固春秋一大條貫然
是會也晉人合諸侯之大夫往會吳于鍾離晉所以
崇吳也吳日強與楚為敵晉日削賴吳以為強故以
殊會而崇吳晉雖殊會以崇吳而春秋則因殊會以
外之所以明內外之辨也吳固姬姓太伯之後而僭

王稱棄周禮春秋雖欲同之中國有不可得也自是
會于祖會于向書法皆與此同惟序會則無譏或曰
齊桓公會王世子于首止非殊會乎曰會王世子而
殊會所以尊王也會吳而殊會晉以是崇吳春秋書
之則為外吳聖人之經有辭同而義異不可以例拘
者若此類是也

義又見襄五
年序會于戚

許遷于葉

許畏鄭偏而求遷于楚故用邢遷之例以自遷為文

自是楚靈無道強遷之于荆楚平復之于葉尋又遷之白羽遷之容城蓋不能以國矣春秋中年以後陳蔡與許專意從楚彼謂楚為可恃以存而不知非我之類其心實異卒之陳蔡為楚所滅許五遷自葉而白羽實楚人迫而遷之已而又遷容城遂為鄭滅棄同好而從強楚許陳蔡自有以取焉耳

十有六年春王正月雨木冰

公羊傳雨而木冰也著月而書是頻也冰者陰凝之

氣得水而冰者常也附於木而冰者失常也方春木
用事木生火者也而陰氣附之以冰陰氣盛強臣僭
是其應也為周正之說者以此正月為仲冬雨下而
著樹即冰記寒甚過其節度故書愚謂十一月正當
盛寒之時雨而冰亦其常也何足為異此所以書正
為夏正正月木冰非時是以書耳

夏四月辛未滕子卒

鄭公子喜帥師侵宋

此鄭叛晉而即楚為楚侵宋也去年鍾離之會鄭猶在列今而遽叛豈非有所侮而動乎晉以秦楚方合懼而有求於吳初未害也而不能審其待遇之禮乃屈節以求之率諸侯之大夫往會吳于鍾離以齊桓公所以待王世子者而待之未能得吳而諸侯之在會者皆有輕晉之心鄭人叛而即楚以是故歟

六月丙寅朔日有食之

晉侯使欒黶來乞師

義已見十三年

甲午晦晉侯及楚子鄭伯戰于鄢陵楚子鄭師敗績
世之人以成敗論事於晉厲公者多所不取愚觀春
秋書法及考當時之事厲之志猶有可嘉春秋未嘗
以其不克終而併廢之也晉自靈成景駸駸日趨于
下其諸卿內慢其君外畏于敵每遇楚師則相與妄
為言說反顧而走惟恐其後由是楚之兵橫行於天
下中國諸侯盡去而從楚晉莫如之何也及厲公者
出乃能興起積衰久弱之勢率其驕狠惰慢之卿以

與楚人一戰城濮以來所未有也論者不深考當時之事每謂欒書之欲戰不若士燮之偽逃實不然也是時楚共叛盟空國以出俾鄭人侵宋以致晉師晉若不出宋將無以自存楚師長驅而來魯衛諸小國皆從風而靡中國之存亡安危未可知也故鄢陵一勝關鍵甚重而晉厲公者量褊不弘志得旋驕反以是速其死良可惜矣烏乎城濮之戰文公勝而益懼懼而增脩其德以是霸鄢陵之戰厲公勝而益驕驕

而務逞其志以是亡觀乎百年二大戰或以之興或以之亡有國有家者知所警矣公羊曰敗者稱師楚何以不稱師王褒也以其傷於矢故舉君傷為重故不稱師愚謂不書師書楚子目其君自取此敗誅叛盟也

楚殺其大夫公子側

成敗利鈍兵家之常楚每敗必殺其大夫楚之用刑亦刻矣況是役也楚共身在軍中乃以敗軍歸過於

其大夫而殺之視秦穆有愧多矣春秋稱國以殺貶也據左傳首敗盟以師侵鄭者皆子反之謀其亦有以自取

秋公會晉侯齊侯衛侯宋華元邾人于沙隨不見公

此譏晉侯驟勝而驕以無禮加於諸侯也先是晉人徵兵於魯穆姜以其間欲有討于季氏公不從而懼于內變遲遲其行晉人疑公之貳於楚不見公而執行父魯實有內難而晉不知恤春秋書不見公言可

以見而不見譏在晉也或曰此魯之辱春秋之不諱
何邪曰春秋之義責在我則為公諱責在外則不為
公諱此書不見公責晉也既責晉矣又何必為公諱
乎平丘之會書公不預盟則責在公

義又見昭公十三年

公至自會

公會尹子晉侯齊國佐邾人伐鄭

征伐當自天子出者也自諸侯專征伐而天子拱手
於上故齊桓晉文之興也大征伐必以王命行之自

是而降強國之所行不皆在於義亦專之而已厲公
之立每用師於四方必請王朝公卿與俱彼非力之
不足亦仗王命以臨諸侯示有所稟但王之公卿數
為霸討出亦非所以尊王也況麻隧勝秦鄢陵勝楚
國威不患不張而兩年之間三以王師伐鄭尹單奔
走道塗輟不及息謂之挾天子以令諸侯則可謂之
尊天子而正諸夏則未然也或曰春秋奚以無貶乎
曰貶也前此齊桓伐宋單伯會伐春秋特書單伯以

貴之單伯不與諸侯序也今尹子單子三以伐鄭出
皆與諸侯序譏晉人數勤天子之老輕用王師亦譏
王朝公卿不當為霸討而數出也

曹伯歸自京師

以譏王討不伸罪人得以佚罰也負芻弑嗣君自立
為君晉會諸侯執而歸之京師當明正大刑宣示遠
近孰曰不然執之未幾而釋之罰不傷毫毛復俾君
于其國周自是愈無以號召海內然實晉之罪也或

曰晉文執衛侯執曹伯始執之皆不名及其歸皆名
負芻之罪浮於二君歸之而不名何邪曰衛侯曹伯
之罪小歸而名之以結正其事也今負芻罪大當討
必不可赦者也乃聽其復歸是故不名以譏周家之
失刑然實誅晉也會諸侯而釋篡賊何以為盟主

九月晉人執季孫行父舍之于茗丘

冬十月乙亥叔孫僑如出奔齊

十有二月乙丑季孫行父及晉卻犇盟于扈

公至自會

乙酉刺公子偃

季孫之執僑如之奔公子偃之刺卻犢之盟春秋備書其事為魯國隱憂非為季孫之執之釋而書也當宣公之世季氏之威福已張襄仲之子歸父為公謀將以晉人之援鋤而去之使未及反宣公即世歸父見逐季氏之權愈甚國中之人莫不畏而惡之成公闇弱慮不及此穆姜與僑如共為此謀斯蓋歸父前

日與宣公欲為而未克濟者其心雖未必純乎為國
其事不為不是而況穆姜者傳載其平日言論引詩
述禮尚有典刑淫佚失行必不至如魯史所言之甚
史為季氏故深詆穆姜愚以為未足盡信為此故耳
蓋晉人之執季孫雖曰以魯貳故實卻讎謀為魯國
去其蝨賊其釋之也雖曰魯人請之實則欒范之私
之使非行父外交有素彼晉人二三臣豈曲為之用
力若此者乎或曰傳稱行父為社稷臣子之疾之不

亦甚乎曰行父者始與襄仲共謀弑君陷叔仲惠伯于死魯亂賊之亞也其後與襄仲爭權相失宣公亦自惡其專而欲去之宣不死歸不奔則季氏之逐亦已久矣今穆姜欲伸宣公之遺志事迄今弗遂行父自晉脫歸大逞執辱之憾幽君母子廢宮殺無罪之公子魯之政權一出季氏其君拱手而已東漢之季伏后謀誅曹操事洩操使其黨幽后而殺之併殺二皇子其事與此相類成公冥頑無知視強臣之幽其

母恬然若無事者春秋之書法如此著季氏之亂遂成魯自是愈不能國矣故愚謂宿城費作三軍取卞意如逐昭公乃行父心術念慮間事孰謂行父為魯之純臣乎

十有七年春衛北宮括帥師侵鄭

夏公會尹子單子晉侯齊侯宋公衛侯曹伯邾人伐鄭

義已見去年秋伐鄭
又見今年冬伐鄭

六月乙酉同盟于柯陵秋公至自會

義已見五年
同盟蟲牢

五年蟲牢之盟同盟之變例也以王崩諸侯不奔喪而同為之盟也此書同盟亦變例以王人預于盟書以譏也或曰伊川以此同盟為同病楚陸氏謂不重言諸侯而書同盟譏尹單預于盟二說何如曰陸說近之矣柯陵之同與前日異方鄢陵之未戰也楚兵躡藉中原中國諸侯有自拔而預于夏盟者春秋錄其外楚而書同盟及鄢陵之既戰諸侯無憚于楚是以翕然俱來時使之然非其能外楚也以為王人下

盟變例而書所以譏也或曰翟泉之盟王人亦預春秋何以不書同盟曰盟于王城之內王不能裁正其

禮直書其事王亦有責也

義又見襄三年雞澤

齊高無咎出奔莒

義見十八年齊殺國佐

九月辛丑用郊

郊義始見僖三十一年

穀梁曰夏之始可以承春以秋之末承春之始蓋不可矣九月用郊用者不宜用也公羊亦曰用者不宜用也諸說不同然未有確論愚謂魯人每卜而後郊

或以春或以夏初無定期大率皆非所以當用而用
春秋不書用郊夫豈無故豈非魯始用九月郊僭王
者大饗報功之禮春秋以其出於常典之外故變文
而書之乎蓋古者春而祈穀秋而報功皆有事于上
帝祈穀以夏正報功以九月魯前此旣僭祈穀之郊
至是復以九月講行報功之典僭而又僭者也是故
書以譏之

晉侯使荀瑩來乞師

冬公會單子晉侯宋公衛侯曹伯齊人邾人伐鄭

十有一月公至自伐鄭

或曰晉人三以諸侯之師伐鄭黷于用武春秋無貶
何哉曰備書其事即所以貶也春而伐冬而又伐王
人轍未及息再以伐鄭告欒黶乞師未幾而荀偃復
乞師兵愈忿而鄭愈不來觀春秋之備書而知責晉
為深烏乎晉會吳于鍾離而鄭始叛去晉敗楚于鄢
陵而鄭不復來非鄭之力有餘而晉之德不足也使

厲公于鄢陵既勝之後不驕不矜惟德惟惠勤撫諸侯而置鄭人叛服于度外鄭將自來而何以屢伐為哉厲之才本可以嗣霸德之不足以此取敗惜哉

壬申公孫嬰齊卒于狸脰

十有二月丁巳朔日有食之

邾子貜且卒

晉殺其大夫卻錡卻犇卻至

或曰范文子當鄢陵之未戰則深不欲戰及戰而既

勝則憂懼求死若禍之在朝夕彼何以知其然也曰
以厲公之為君與欒郤之為臣而知其終之必至於
此也君好勝而忌其臣臣好專而虞其君不至於大
亂不已也雖然三郤晉之能臣嘗有功於其國其臨
敵慮勝晉諸卿未有能出其右者藉其有罪猶當在
議功議能之科今以左右之浸潤殺之并及其族厲
之狂暴抑亦甚矣一朝而殺三大夫欲無亡得乎春
秋書之即所以貶也謂春秋無貶不可也

楚人滅舒庸

義已見宣八年
楚人滅舒蓼

十有八年春王正月晉殺其大夫胥童

三卻之死晉厲殺之也胥童之死據左傳樂書中行
偃殺之也春秋一以國殺為文著胥童導君作難而
其君由是以殞童亦晉國之罪人也人臣與君俱死
于難是之為死節孔父仇牧荀息之事是也春秋繫
之於君錄死節也胥童與厲公先後死春秋繫之于
國以國殺為文者為其有當誅之罪也使胥童大節

可錄則必用仇孔之例繼其君而書死矣

庚申晉弑其君州蒲

厲公也悼公立

或曰春秋於晉靈之弑則正趙盾之罪於晉厲之弑則略樂書中行偃姓名而不書豈非厲之惡為甚故稱國以弑歟曰春秋之褒貶即帝王之賞刑帝王賞刑載在方冊不惟學士大夫識之天下之人莫不識之夫豈有高深奧蹟不可窺測者乎蓋弑父與君人臣之大惡有權臣用事弑君而不以其實來告者有

衆弑其君而具以實來告者有史失書而聖人特為之書之者有史已書而聖人革而止之者皆所以垂法於後晉靈之弑趙盾弑之也晉厲之弑國人共起而弑之也國人何以弑之晉自邲之敗卿佐下逮士伍望楚人之顏行輒相率引避晉由此不競楚由此橫行中原幾二十年鄢陵之遇若從諸大夫之言其亦遁矣幸而郤氏排衆議先羣卿以與楚戰由此有功中國之勢賴以復張狂楚之燄因是少戢謂宜大

明慶賞以慰士大夫之心而厲也剛暴不仁疾諸卿
之專恣已不得以逞乃鼓一勝之餘驕首殺有功之
帥不惟殺其身又滅其家其亦慘甚矣意國中之人
三軍之帥下及士卒憤怒激烈羣起而弑之春秋書
法如此蓋紀其實也不然晉靈與厲均非令主靈之弑
也春秋為之正弑賊之罪厲之弑也乃以國弑為文
春秋必不然也左傳專歸獄於欒書中行偃而又謂
三卻之死欒書與厲公實同其謀此皆他國傳聞之

辭為說不一樂書既同其誅卻之謀不應又為謀弑之首此有以知其為衆弑非獨二人之罪也

齊殺其大夫國佐

齊靈不能防閑其母使之以淫亂著又受其母之譖而致高鮑于戮靈之不君甚矣而國佐不忍一旦之忿誅慶克據盧以抗其君專殺之罪猶有可言據盧則不得謂之非叛矣然原其本心則在於為其君正家法而施之無序以及於此是可憫也故春秋以累

上書

公如晉

夏楚子鄭伯伐宋宋魚石復入于彭城

自入春秋諸侯之納國君者有矣未有諸侯以兵納
亡臣者楚國不道前納孔寧儀行父于陳此復輔魚
石以入于宋黨罪人而隳其宗國亂道也凡諸侯出
奔雖失位而不失國諸侯以師納之復之於國耳大
夫出奔旣失位矣并爵邑皆非其有諸侯復之於其

君請而復之耳。今楚子親持大兵挾魚石以入彭城，與納諸侯亡公子之事異矣。何休謂不書魚石入彭城，以叛者楚伐宋，取彭城以封之，本受之於楚，非得之於宋，愚以為不然。彭城，宋邑。魚石，宋臣。何楚封之，足言乎春秋不麗之於叛者。閔魚石之始，本無欲亂之心，為華元所陷，以至此原情未減，是故不以叛書。及華亥向寧作亂于內，始書入于南里以叛。此春秋用法之權衡也。

餘義又見諸侯圖宋彭城

公至自晉

晉侯使士匄來聘

秋杞伯來朝

八月邾子來朝

築鹿囿

穀梁曰築不志此其志何也山林藪澤之利所以與民共也虞之非正也愚謂凡書築書築城有譏者有不譏者城要害以保人民固封疆不得已而為之不

皆譏也乃若築臺築園此不過為遊畋一時之樂凡
書築皆貶也當成公之世內有二強家肘腋之虞外
則晉楚並立莫適所從而公猶築園從畋以樂愒淫
無怪公室之日卑也

己丑公薨于路寢

冬楚人鄭人侵宋

晉侯使士魴來乞師

併見下

十有二月仲孫蔑會晉侯宋公衛侯邾子齊崔杼同盟

于虛打

楚鄭今年夏伐宋納魚石于彭城至是復侵宋間晉
難也悼公合諸侯于虛打將以救宋此會師雖未戰
足以伐楚人之謀悼之此舉善矣是故書同盟言諸
侯之同欲也但魯成未葬嗣君幼弱晉人發兵不為
之少輟無恤喪之義矣書乞師貶也非所當乞而乞
是故書乞

丁未葬我君成公

春秋集傳詳說卷十八

欽定四庫全書

經部

春秋集傳詳說卷十九

二十九

詳校官鴻臚寺少卿臣梁景陽

給事中_臣溫常綬覆勘

覆校官博士臣劉光第

校對官助教臣汪錫魁

謄錄監生臣程元鼎

欽定四庫全書

春秋集傳詳說卷十九

宋 家鉉翁 撰

襄公一

名午簡王十四年即位母定
嬖成公妾是歲晉悼二年

元年春王正月公即位

仲孫蔑會晉欒黶宋華元衛甯殖曹人莒人邾人滕人

薛人圍宋彭城

左傳曰非宋地追書也杜注成十八年楚取彭城以

封魚石故曰非宋地夫子作春秋追書繫之宋胡文

定亦曰圍彭城者魯史舊文圍宋彭城者仲尼親筆其義正矣愚謂繫彭城於宋者不與楚以得彭城也魚石自宋奔楚楚以兵納之彭城則彭城既爲楚所得矣由常情而觀必謂彭城已非宋之有春秋正名之書於魚石則曰宋魚石於彭城則曰宋彭城不以列國叛人列國境土而屬之於楚所以辨逆順内外之分也書諸侯之大夫圍宋彭城褒之也爲宋圍彭城而不私其有同盟之義也晉悼公在位十五年惟

此事可書故當時諸侯翕然歸之外是實多可疵論者惑於左傳之浮辭譽過其實甚者以爲悼優於文襄讀書不具眼其弊至此具論於下

夏晉韓厥帥師伐鄭

仲孫蔑會齊崔杼曹人邾人杞人次于鄆

齊桓公糾合諸侯不以兵車最後次于召陵問楚之罪不戰而楚服矣晉文自城濮一戰之後未嘗輕用諸侯之師霸者豈以屢戰爲功聖人亦不以屢戰而

許人以霸晉厲既勝于鄢用師不戢以逮於亡悼之
立自當息民安諸侯先爲自治之計伐鄭非所急也
今彭城之師始班而伐鄭之役繼起自此以後十三
年之間十以諸侯之師伐鄭或連歲而再舉或一歲
而兩興師既得鄭又伐秦諸侯之大夫無寧居之日
齊桓晉文之用諸侯不如是之甚也至於輔強臣以
抗其君獎篡賊以成其亂自是而後中國之政皆自
大夫出其君拱手而不敢問篡弑相踵晉悼實啓之

儒者惑於左傳之浮辭而不原春秋書法此最讀經

一大病耳

餘義見雞澤邢丘
漢梁及晉悼之卒

秋楚公子壬夫帥師侵宋

楚納宋之叛人悖於義也晉以諸侯之師克彭城執
五叛以歸伸霸討也楚不知自反復以兵加於宋將
以雪前恥而恥益甚焉左傳以爲侵宋救鄭其實不
專爲鄭是以春秋不書

九月辛酉天王崩

簡王也
靈王立

邾子來朝

冬衛侯使公孫剽來聘

晉侯使荀瑩來聘

案禮曾子問諸侯相見揖讓入門不得終禮廢者幾
孔子曰六天子崩太廟火日食后夫人之喪雨雪服
失容則廢今天王崩而諸侯講朝聘之常儀不異平
日無王也泰山孫氏曰天王崩邾子來朝衛侯使公
孫剽來聘晉侯使荀瑩來聘皆不臣也左傳乃曰衛

子叔晉知武子來聘禮也凡諸侯即位小國朝之大國聘焉知朝聘之爲禮而不知喪王之禮爲尤重此左傳之失也杜元凱爲說以通之曰未聞喪故得行朝聘之禮考以其時王赴亦當聞於中國久矣春秋繼王喪而書朝書聘朝者聘者受之者皆當有誅孫泰山之義正

二年春王正月葬簡王

杜氏曰五月而葬速也自入春秋葬天子不書義已

見隱三年其有書崩書葬者或以譏其緩或以譏其速或以魯奔會不如禮而書以責之

鄭師伐宋

義見下鄭伯踰卒

夏五月庚寅夫人姜氏薨

左傳以爲齊姜成公夫人襄之嫡母齊氏也春秋書夫人姜氏薨以著定姒之非嫡春秋於魯先君之妾母不容黜其僭號每微見意焉齊姜與定姒並書卒葬而嫡妾之分見矣

餘義見四年七月定姒薨

六月庚辰鄭伯踰卒

自晉楚爭鄭以來鄭之從楚猶有不獲已之心惟踰也背夏最勇從楚最堅之死靡悔其言曰楚君以鄭故親集矢於其目非異人任寡人也夫楚共所以力戰而不能戢亦自爲爭諸侯計夫豈爲鄭故而踰之言若此甘於從楚者也春秋特去其莖

晉師宋師衛甯殖侵鄭

伐喪春秋之所甚惡也他人伐喪猶欲盟主仗義以

正之而況爲盟主而伐人之喪者乎晉侯始立伐鄭諸侯有鄆之次今復乘鄭之喪而侵之失其爲盟主之道矣其後鄭人弑其君而從楚以伐喪爲說晉何以辭其責春秋繼晷之卒而書三國伐鄭貶其動大師伐人之喪也衛甯殖獨書名范氏述穀梁之意曰初衛侯速卒鄭人侵之故舉甯殖之報以明稱前事本訥乃謂晉欲得鄭固無問其伐喪此以後世權謀智詐而律春秋鹵矣

秋七月仲孫蔑會晉荀瑩宋華元衛孫林父曹人邾人

于戚

義并見下
城虎牢

己丑莖我小君齊姜

義已見五
月姜氏薨

叔孫豹如宋

冬仲孫蔑會晉荀瑩齊崔杼宋華元衛孫林父曹人邾人滕人薛人小邾人于戚遂城虎牢

自秋及冬再會于戚春秋備書以見晉政之繁然遂城虎牢則春秋無譏也自晉厲季年不務德以懷諸

侯惟汲汲會伐鄭晉悼繼之用師無寧歲幸而魯有賢大夫孟獻子首建虎牢之議控扼險要以制鄭之死命鄭於是始屈蓋力屈非心服也春秋何取焉曰春秋辨天下內外之分者也虎牢諸夏之藩表得之以興失之以亡內外之限界在焉邑雖繫於鄭險則關乎中國故城虎牢不繫之鄭明虎牢非鄭之所宜有也鄭之封疆嘗受之天子曷以不繫之鄭乎曰鄭叛而從楚以天子之侯度甘爲楚屬辱天子之封守

罪當削書諸侯城虎牢不曰鄭虎牢削之於鄭也削之於鄭曷以歸乎歸之於中國也歸之中國所以正天下內外之分故書曰遂城虎牢蓋舊史書城鄭虎牢聖人削之書城虎牢故曰春秋非聖人不能脩

楚殺其大夫公子申

義備見五年
楚殺壬夫

三年春楚公子嬰齊帥師伐吳

吳楚交兵久矣春秋不書至是始書此著天下迭爲盛衰中國安危存亡於此乎係也楚自成穆始憑陵

諸夏至於莊而其燄益煽而晉之霸業及是乃衰幸而吳日以大爲楚之內梗諸夏得以小康以吳故也晉悼公之興適當斯時以服鄭而楚不敢爭者非畏晉也以吳人之議其後也自周東遷大勢已去天爲生二霸以整頓之霸政既弛而大伯之後繼興相與扶持姬籙以不墜於地天實爲之豈偶然哉厥後吳亡而春秋終晉大夫篡其君而周不復可興矣

公如晉

夏四月壬戌公及晉侯盟于長檣公至自晉

杜注晉侯出其國都與公盟于外也諸侯會盟不於其國都而必盟於外謙也魯君以童穉之年往朝於晉悼公於其歸也出長檣而與之盟勤於用禮故春秋書以美之

六月公會單子晉侯宋公衛侯鄭伯莒子邾子齊世子光己未同盟于雞澤陳侯使袁僑如會戊寅叔孫豹及諸侯之大夫及陳袁僑盟

是會也鄭服而陳亦來會之盛者也而其失有二盟大夫也盟王人也盟大夫大夫張也盟王人諸侯僭也故雖盛會而有貶辭諸侯盟于雞澤既盟而陳侯使袁僑如會受而禮之需其君至而及之盟雖後會可也乃以一袁僑之故命諸侯之大夫別爲之盟君盟於前臣盟於後不足以結袁僑實開大夫仇君之漸穀梁謂雞澤之盟大夫張諸侯始失正得經意矣葵丘踐土天子之宰在焉不下預諸侯之盟也翟泉

柯陵屈王人共歆春秋皆譏晉悼欲植霸業而不能
以尊王爲事俾單子下預列國之盟諸侯僭王人大
夫僭諸侯一舉而二失隨之書同盟非所當同而同
也或曰先儒以同外楚而書同其然歟曰時有不同
未容執例以爲同也當晉積弱之世楚鯀方張諸侯
預于夏盟曰同外楚可也自鄢陵既勝楚人內困于
吳諸侯之從晉者畏威而同盟謂之非譏不可也或
曰陳鄭久叛而來服其不謂之同乎曰此厲之所爲

而悼享其成耳晉自邲敗幾不能以國厲之始立躬
擐甲冑率先羣卿以與楚戰鄢陵之勝不在城濮下
又會吳楚交兵收吳人與之盟遂斷楚之右臂其立
志實未可量而器小易盈驕以取敗悼繼之未幾陳
鄭來會鄢陵一戰之功也其後三駕而楚莫能與爭
本無他技特以楚人內困於吳自救之不給是以置
鄭於不爭正如漢武用兵匈奴海內爲之虛耗宣帝
坐享其成見謂中興之主若以呼韓款塞盡爲漢宣

之功則不然耳世人以成敗論事毀厲過刻與悼過
優而春秋書法公若權衡讀者識之。或曰盟于女
栗及蘇子也而不書同盟于洮于翟泉會王人也而
不書同此盟王人而書同何也曰女栗之盟魯公自
及蘇子非衆盟也故不言同然不書公及不書王命
則譏也于洮之盟王室有難而爲此盟故不以同盟
爲譏翟泉則王人及諸侯大夫盟于王城之內王不
能正之以禮王亦有責焉耳故不書同盟

義又見傳
二十一年

于幽成五年蟲牢十七年柯
陵襄二十五年同盟于重丘

秋公至自會

冬晉荀罃帥師伐許

四年春王三月己酉陳侯午卒

胡文定謂午襄公名也孔子作春秋在哀公之世襄
公乃哀之皇祖考曷爲不諱夫子兼帝王之道參文
質之中見之春秋如莊公名同而書同盟僖公名申
而書戊申定公名宋而書宋人與襄名午而書午之

類從其質也愚謂夏殷以前不爲諱周人以諱事神
始爲之易名之典廟中稱諡不稱名乃所以諱外是
初無所諱詩書不爲文武諱是其明證至於衰世無
所往而不諱如申繻荅桓公之問晉廢司徒宋廢司
空魯廢具敖二山皆臣下以陷爲忠非盛時之制也
檀弓云既卒哭以水鐸狗曰舍故而諱新此以神事
之故於其死而爲之諱未聞生者而爲之諱而況於
嫌名則諱二名則偏諱如後世之所爲此皆戰國亡

秦之弊典律以春秋之法則在所當革也

夏叔孫豹如晉

秋七月戊子夫人姒氏薨

公作弋氏

或曰此成公妾襄公母非嫡夫人也自齊姜卒而定
姒始僭夫人之稱春秋何以無譏曰先君夫人一而
已矣春秋既於前年書夫人姜氏薨葬我小君齊姜
以明成公廟有兩夫人兩小君以著襄躋妾母配先
君之罪不加貶而義自見謂春秋無貶不可也

葬陳成公

八月辛亥葬我小君定姒

冬公如晉

陳人圍頓

左傳楚使頓間陳而侵伐之故陳人圍頓頓楚之使也陳人既遣袁僑如會故爲楚所惡陳之圍頓爲中國也春秋著陳人之從中國故書凡書圍皆貶此以中國之與國而治荆楚之屬國則非貶讀者謹之

五年春公至自晉

夏鄭伯使公子發來聘

叔孫豹鄆世子巫如晉

穀作
繒

公羊曰外相如不書此何以書爲叔孫豹率而與之俱也曷爲率而與之俱舅出也莒將滅之故相與往

殆乎晉

殆猶言
疑而讞

取後乎莒也莒女有爲鄆夫人者欲

立其所出也左傳則以爲魯請屬鄆于晉故偕鄆世子以往二說未知孰是然公羊之義必有所從授春

秋因鄆莒之事以垂異姓泣後之戒

餘義見莒人滅鄆

仲孫蔑衛孫林父會吳于善道

公羊作善稻

案左傳吳子使壽越如晉辭不會于雞澤之故且請聽諸侯之好晉將爲之合諸侯使魯衛先會吳且告會期故孟獻子孫文子會吳于善道甚矣夫晉人求吳之急也求之急故用禮過於卑而有所不憚然內外之辨内外之分斷斷乎其不可紊也故吳以號舉不與晉之虧禮而求吳也

秋大雩

楚殺其大夫公子壬夫

案左傳楚人討陳叛之故以爲令尹子辛實侵欲焉
乃殺之前日殺公子申曰多受小國之賂今日殺公
子壬夫又以侵欲於陳而使之叛楚猶有政二大夫
不得爲無罪但連歲殺大夫用刑過慘春秋不與也
故皆稱國以殺乃若晉景之殺同括晉厲之殺三卻
皆爲讒邪所陷殺人雖多而晉國日趨於削殺非其

罪也楚之用刑雖慘而國猶能強豈非權出於上猶有辭於殺歟

公會晉侯宋公陳侯衛侯鄭伯曹伯莒子邾子滕子薛伯齊世子光吳人鄫人于戚

或曰内外有辨春秋所以垂法前此及戎狄會盟春秋未嘗無譏今會吳于戚進而人之何歟曰義之所可與也勢之所宜交也吳太伯之後無可外也以其僭王之號而外之今吳請預于會春秋矜其爲太伯

之後而收之以附於諸侯之末義之所當與也中國之人同欲外楚吳與楚連歲交兵其外楚之心與中國諸侯同之又勢之所宜交也故戚之會吳始書人進之也吳可進而春秋進之無傷乎內外之辨其後吳卒去僭號同於中國諸侯春秋進之自此始

公至自會

冬戍陳

義并見
下救陳

楚公子貞帥師伐陳

公會晉侯宋公衛侯鄭伯曹伯齊世子光救陳十有二月公至自救陳

成者成之於無事之時救者救之於被兵之日成陳矣而又救之春秋書以善晉也公羊曰孰成之諸侯成之不言諸侯離至不可得而序故言我也穀梁曰內辭也以爲魯獨成之恐不然蓋成之者諸侯也救之者亦諸侯也前是有成者救者今晉悼既以諸侯之師成之及楚師之來以成爲未足又動大兵往救

焉書戍書救褒也

辛未季孫行父卒

義見文十六年晉人執行父舍于苕丘又見襄九年穆姜薨

六年春王三月壬午杞伯姑容卒

夏宋華弱來奔

據左傳華弱與樂轡少相狎長相優又相謗也轡以弓
楛華弱於朝平公見之曰司武而楛於朝難以勝矣遂
逐之司城子罕曰同罪異罰非刑也專戮於朝罪孰大
焉亦逐樂轡春秋不書轡奔著宋公用刑之不能平也

秋葬杞桓公

滕子來朝

莒人滅鄆

公穀大條貫數十皆洙泗高弟親聞之聖人以授其
門弟子惟公穀有傳於後如莒人滅鄆亦其一也周
衰倫教不競有以他姓爲繼嗣者滅人之國而人自
以爲非滅如鄆事者往往有之聖人特於此垂訓焉
諸儒多從左氏之說謂莒實滅鄆是時晉悼主夏盟

豈有莒人滅同盟之國而全置不問愚以爲當從公
羊之說庶不失聖人因事垂法之意

冬叔孫豹如邾

季孫宿如晉

十有二月齊侯滅萊

或曰滅國惡也而齊以爵書何歟曰有以爵書爲褒
者有以爵書爲貶者隨事而可見滅國惡之大者而
曰其君所以誅也齊爲無道利人之土地殘暴而賊

虐之必爲滅之之計萊未嘗有犯於齊也目其君書
曰齊侯滅萊責之深矣尚何爵之有哉

七年春郟子來朝

夏四月三卜郊不從乃免牲

義已見僖三十一年

左傳桓五年著例曰啓蟄而郊茲又述孟獻子之言
曰吾乃今而後知有卜筮郊祀后稷以祈農也故啓
蟄而郊郊而後耕今既耕而郊宜其不從杜注於桓
五年及今皆曰啓蟄者夏正之正月祀天南郊疏家

引夏小正正月啓蟄其傳曰言始發蟄也漢氏之始猶以啓蟄爲正月中雨水爲二月節及太初以後更改氣名以雨水爲正月中驚蟄爲二月節以迄于今其實古驚蟄在正月始雨水則在仲春以是知啓蟄而郊郊必在夏正正月者周制也左傳謂周人以建子爲歲首而啓蟄之郊必以夏正之正月此又周家四時十二月次一用夏正之明證也然周禮冬日至禮天神於地上之圜丘郊特牲亦曰郊之祭也迎長

日之至大報天而主日此又南至之郊周人蓋兼舉之說者謂夏正之郊以后稷配南至之郊以帝嚳配皆報本反始之義不專爲祈農也孟獻子之言與月令之制皆以孟春祈穀爲說蓋以啓蟄爲東作將興之候故目夏正爲祈穀之郊亦無害於義大率經傳一歲而祀天者三南至也孟春也季秋大饗也南至專主報本而孟春季秋以祈焉以報焉聖人制禮之意其在是乎若夫魯人僭郊初無定時卜吉而後舉

行是以羣公之郊有先後早晚之不同春秋因其卜
之不吉以示戒云耳○禮記又載孟獻子之言謂正
月日至可以有事於上帝七月日至可以有事於祖
此又以周正之建子月爲春建午月爲秋古有冬夏
至者矣未聞有春秋至者也此恐非孟獻子之言與
傳所載啓蟄異矣禮記中似此多出漢儒之傳會

小邾子來朝

城費

或曰左傳謂季孫行父相三君無衣帛之妾無食粟之馬無藏金玉無重器備而厥嗣甫得襲爵即首以城費爲事父子所爲何相遠至是乎余曰不然行父之廉之儉信如傳者所言則當遠權而弗即舉魯國賢人代居己之處請于君飭其子毋使預聞魯政夫然後得爲忠今而身死子繼首城其賜邑是將以仇君而專國宿之罪大矣行父亦有責焉春秋書城費以著季氏犯上作亂之漸

義己見成十七年晉人執行父

秋季孫宿如衛

八月螽

冬十月衛侯使孫林父來聘壬戌及孫林父盟

列國之大夫相聘因爲之盟非仇也蓋自霸國之興
諸侯惟事盟主魯衛宋鄭不相朝也其爲盟又與盟
主偕盟列國之君復不自爲盟也不相朝不自爲盟
故因大夫來聘而尋盟是不爲仇

楚公子貞帥師圍陳

十有二月公會晉侯宋公陳侯衛侯曹伯莒子邾子于
鄆鄭伯髡頑如會未見諸侯丙戌卒于鄆陳侯逃歸
穀梁曰鄭伯將會中國其臣欲從楚不勝其臣弑而
死

公羊曰此大夫弑之曷爲不言大夫弑之爲中國諱
也曷爲爲中國諱鄭伯將會諸侯于鄆其大夫諫曰
中國不足歸也則不若與楚鄭伯曰不可其大夫曰
以中國爲義則伐我喪以中國爲彊則不若楚於是

弑之左氏則以爲子駟自以其私憾而弑君踈矣嗟
夫子駟之惡極矣君有善謀沮之不得而遂動其惡
其罪直不容死而要之其必有所授矣鄭伯雖死不失爲列
國之諸侯陳侯既逃遂終爲外裔之役屬以逮於亡
春秋比而書之一袞一斧較然可見而晉人黨姦庇
盜之罪亦無以自逃矣或曰雞澤之會鄭伯至而陳
亦來今會于鄆鄭伯死而陳亦去何邪曰觀公穀之
書鄭事與左傳之書陳事而春秋書法見矣蓋鄭之

見弑陳之所以叛也穀梁謂鄭伯將會中國其臣欲從楚不勝其臣弑而死左氏書陳事亦謂陳之執政有二慶者與楚人謀使公子黃如楚而執之道告于會曰楚執黃矣君不來羣臣不忍宗廟社稷懼有二圖陳侯逃歸是陳與鄭之臣皆不樂其君之從晉或以弑或以刼一朝俱往斯固其臣之罪然亦目見從晉之無益也是亦晉之恥亦晉之責也鄭賊之不討陳侯所以逃也使鄭之賊臣弑其君於國中晉之君

臣猶可謬爲不知以自解今弑之於如會未見諸侯之先謂晉而不知不可也知而不討其失政刑甚矣由晉之羣卿皆前日弑厲之餘孽內有所嫌是以置鄭賊而不問諸侯如會見弑於其臣此中國一大變也而悼乃邈然若無所知恬然略不介意何以慰鄭僖九原之憾而服在會諸侯之心陳侯觀晉無政君臣相與謀逃之而歸鄭伯之死陳侯之逃其實一事耳公羊何氏注鄭伯欲與中國卒逢其禍諸侯莫有

痛疾之心陳侯於是懼而逃歸書以刺中國之無義
此數語深得經意春秋於此一事責晉爲深書曰鄭
伯如會未見諸侯卒于鄆所以明正晉人失賊之罪
黜其霸而同之於諸侯也繼鄭伯之死而書陳侯逃
歸著陳侯之逃爲晉無政而逃使晉人能爲鄭討賊
陳侯必不無故而逃盟春秋責晉之旨極爲明著諸
儒雷同稱譽許晉悼過其實失春秋垂訓之旨矣

八年春王正月公如晉

夏葬鄭僖公

公羊曰賊未討何以書葬爲中國諱也

義詳見上

鄭人侵蔡獲蔡公子燮

鄭人之弑其君所以說楚也乃復出師侵楚之與國何哉蓋晉人僞爲不知鄭之弑君者從而撫之鄭亦僞若不欲從楚故侵蔡以求說於晉此皆以僞相從耳鄭之爲僞姑以逃晉人之來討晉之爲僞亦苟焉而已矣身爲盟主不能救人之災恤人之患以討殘

賊以大服天下之心乃欲掩藏覆護苟示羈縻豈不爲鄭人所鄙笑乎春秋書侵書獲蔡鄭皆不與也蔡甘於從楚鄭僞於從晉夫豈春秋所與乎

季孫宿會晉侯鄭伯齊人宋人衛人邾人于邢丘

君在而大

夫爲會

穀梁曰君在而大夫爲會見魯之失正也泰山孫氏曰邢丘之會公在晉也晉侯不與公會而與季孫會襄公微弱政在季氏故也晉爲盟主棄其君而與其

臣何以宗諸侯晉侯之惡亦可見矣愚謂此一書而三示貶也以霸主之尊而會諸侯之大夫諂也是時諸侯之大夫皆怙權以陵制其上正望盟主有以裁之乃復諂而與之會鄭人弑君不爲之討賊更使新君立於衆大夫之間魯君身在晉而復會季氏獎其臣而卑其君遂使季日益橫魯日益削凡皆晉悼之所爲而春秋之所深貶也自入春秋百五十年未有國君在會而大夫亦預於盟者雞澤之不戒而邢丘

抑又甚焉晉悼務以聲音笑貌悅人而悖義害禮有所不恤亦由晉之羣卿以其所以專晉者而施之他國遂亂人君臣之分至於溴梁而濫觴者滔天矣愚故謂春秋未嘗與晉悼以霸

公至自晉

莒人伐我東鄙

秋九月大雩

冬楚公子貞帥師伐鄭

始鄭人弑其君於會以說楚也既而侵蔡欲以自結於晉論者謂其介於二國之間苟爲自全之計然其從楚者本謀也其未遂與晉絕者僞也子駟之徒志在從楚楚至而服惟恐其後矣使晉人能爲鄭討賊駟可戮貞可卻而鄭之與陳先後偕至矣晉悼詔以媚其大夫復諂以結諸侯之强大夫當爲者不能爲當正者不能正當討者反與之厚霸國之紀綱至是而盡替徒以吳壽夢適心中國故楚人稍知所畏憚

鄭卒來歸外是豈有一事之可稱哉讀春秋勿爲左
傳浮辭所惑

晉侯使士匄來聘

春秋集傳詳說卷十九